

Decreto 4/1987, do 8 de xaneiro, polo que se aproba o Regulamento de organización e funcionamento do Consello de Comunidades Galegas.

A Lei galega 4/1983, do 15 de xuño, de Recoñecemento da Galeguidade, creou o Consello de Comunidades Galegas como órgano representativo das comunidades galegas asentadas fóra de Galicia.

A citada norma legal contén unhas referencias mínimas tocante á natureza, composición e funcións tanto do consello como da comisión delegada que se deberá constituír no seu seo, e remite expresamente, no demais, ás normas que regulamentariamente desenvolvan a lei.

Cómpre, pois, proceder a dictar esa normativa regulamentaria, configurando e delimitando o alcance das disposicións legais sobre organización, funcionamento e réxime de adopción de acordos polo consello e pola comisión delegada, que fagan operativas e eficaces as previsións legais.

Por iso, a proposta do conselleiro da Presidencia e logo de deliberación do Consello da Xunta de Galicia na súa reunión do día oito de xaneiro de mil novecentos oitenta e sete,

DISPOÑO:

ARTIGO 1º.

1. O Consello de Comunidades Galegas, creado pola Lei galega 4/83, do 15 de xuño, de recoñecemento da galeguidade, é o órgano colexiado de representación das comunidades galegas asentadas fóra de Galicia.

2. Con carácter deliberante e funcións consultivas, o consello asesorará á Administración autonómica para os efectos de cumprir os fins establecidos na mencionada lei.

ARTIGO 2º

1.- Compoñen o Consello de Comunidades Galegas:

Presidente:

- O presidente da Xunta de Galicia.

Vocais:

- Os conselleiros da Presidencia e Administración Pública, de Educación e Ordenación Universitaria, de Industria e Comercio, de Traballo e Servizos Sociais, de Cultura e Xuventude e de Sanidade, que poderán delegar no secretario xeral técnico ou nun director xeral da súa consellería.

- Un representante do Consello da Cultura Galega.

- Un representante de cada unha das tres universidades galegas.

- Un representante por cada unha das comunidades inscritas no Rexistro de Comunidades Galegas.

- Así mesmo forman parte do consello os secretarios xerais para as Relacións coas Comunidades Galegas, para o Deporte e para o Turismo.

2.- Participará nas sesións do Pleno do consello un representante de cada unha das comunidades de residentes no exterior nas que exista unha presenza maioritaria de galegos.

Cada representante deberá posuír unha acreditación habilitante expedida pola Secretaría Xeral para as Relacións coas Comunidades Galegas mediante resolución motivada.

3.- Poderanse incorporar ás sesións do Pleno do consello, con voz pero sen voto, aquelas persoas que o presidente do consello xulgue oportuno que asistan pola súa destacada personalidade ou relevancia nos ámbitos social e cultural de Galicia.

4.- Actuará como secretario do consello, con voz pero sen voto, un funcionario nomeado polo secretario xeral para as Relacións coas Comunidades Galegas.

(Nova redacción dada polo Decreto 195/91, do 30 de maio).

ARTIGO 3•

O Consello de Comunidade Galegas actuará a través do seu presidente, do pleno e da comisión delegada que se constituía no seo do consello.

ARTIGO 4•

O presidente do Consello de Comunidades Galegas terá as seguintes funcións:

- Ostenta-la superior representación do consello.
- Convocar, presidir, e dirixi-las sesións do Pleno, decidindo os empates co seu voto de calidade e adoptando as medidas que coide pertinentes para a boa marcha destas sesións.
- Someter a consideración do Pleno e da comisión delegada cantas propostas considere oportunas para cumprir mellor os fins da Lei 4/1983.
- Aproba-la orde do día das sesións do Pleno, na que se poderán incluí-los temas aceptados por un tercio dos asistentes. As convocatorias serán publicadas no Diario Oficial de Galicia mediante resolución da Secretaría Xeral para as Relacións coas Comunidades Galegas.

(Nova redacción dada polo Decreto 195/91, do 30 de maio)

ARTIGO 5•

Será competencia do Pleno do Consello de Comunidades Galegas:

- Deliberar sobre tódolos asuntos contidos na orde do día e, en particular, sobre os informes, estudos e propostas que sexan sometidas ó seu exame e consideración.
- Elixir e nomea-los vocais representantes das áreas xeográficas na Comisión Delegada do Consello, designando dous suplentes por área.
- Establece-los criterios xerais ós que se terá que suxeita-la actuación da comisión delegada durante o período do seu mandato.
- Calquera outra función que lle poida corresponder conforme á Lei galega 4/1983, de recoñecemento da galegitude, e que estea expresamente atribuída a outros órganos.

ARTIGO 6•

O Pleno reunirásese en sesións ordinarias cada tres anos e en sesións extraordinarias cando o presidente o considere necesario ou cando o soliciten, polo menos, a metade dos seus compoñentes e o presidente o sultue oportuno.

ARTIGO 7•

1.- O Pleno quedará validamente constituído, en primeira convocatoria, cando estea presente a maioría simple dos seus membros e, en segunda convocatoria, sexa cal sexa o número dos asistentes.

2.- Os representantes das comunidades galegas acreditarán a súa personalidade e representatividade por certificación do acordo ó respecto da súa xunta directiva, asinada polo secretario e co visto e praxe do presidente.

ARTIGO 8•

1.- A comisión estará composta por:

- O presidente da Xunta de Galicia.
- O secretario xeral para as Relacións coas Comunidades Galegas.
- Catro vocais representantes dos centros de España inscritos no Rexistro de Comunidades Galegas.
- Catro vocais representantes dos centros do resto de Europa inscritos no Rexistro de Comunidades Galegas.
- Catro vocais representantes dos Centros de América inscritos no Rexistro de Comunidades Galegas.

2.- Actuará como presidente da comisión o presidente da Xunta de Galicia ou, se é o caso, o secretario xeral para as Relacións coas Comunidades Galegas e como secretario, con voz pero sen voto, un funcionario nomeado polo citado secretario xeral.

3.- A orde do día e a convocatoria da comisión delegada será fixada, logo de conformidade do presidente da Xunta de Galicia, polo secretario xeral para as Relacións coas Comunidades Galegas mediante resolución publicada no Diario Oficial de Galicia.

(Nova redacción dada polo Decreto 195/91, do 30 de maio)

ARTIGO 9•

Durante o período de tempo que dure o seu mandato, a comisión delegada reunirásese, cando menos, unha vez ó ano e, en todo caso, cando o solicite o seu presidente ou a petición da maioría simple dos seus membros.

ARTIGO 10•

É competencia da comisión delegada:

- Prepara-las sesións do Pleno, tanto ordinarias como extraordinarias, fixando as ponencias que se deban estudar e discutir nel.
- Someter á aprobación do presidente aqueles asuntos que os membros da comisión consideren que deben ser incluídos na orde do día, tanto do Pleno como da comisión delegada.

- Elabora-la memoria anual que preceptúa o art. 14º da Lei 4/1983, tendo en conta o anteproxecto presentado pola Dirección Xeral de Relacións coas Comunidades Galegas.
- Executa-las competencias que delegue nela o Pleno ou que lle sexan atribuídas por lei.

(Nova redacción dada polo Decreto 195/91, do 30 de maio)

ARTIGO 11•

- 1.- Os acordos adoptados, tanto en Pleno coma en comisión delegada, serano por maioría simple dos seus membros presentes.
- 2.- O vocal que disinta da maioría poderá pedir que conste na acta o seu voto negativo. Se quere, poderá formular voto particular, escrito e fundado, que se incluírá na acta, sempre que o presente dentro do día seguinte a aquel no que se tomou o acordo.
- 3.- Cando a comisión delegada faga uso das súas facultades de informe e asesoramento, os votos particulares razoados incorporaránse ó texto do acordo adoptado, e uniránse á documentación que se remita ó órgano destinatario.

ARTIGO 12•

Os acordos dos órganos do Consello de Comunidades Galegas serán certificados polo secretario e levarán o visto e prace do presidente.

ARTIGO 13•

Os acordos do Consello de Comunidades Galegas enviaránse, á través da Dirección Xeral de Relacións coas Comunidades Galegas, ó Consello da Xunta de Galicia.

ARTIGO 14•

En todo o non previsto neste regulamento observaránse as disposicións legais sobre procedemento administrativo en canto lles sexan de aplicación.

DISPOSICIÓNS DERRADEIRAS

Primeira: Quedan derogadas tódalas disposicións que se opoñan ó establecido neste decreto.

Segunda: Facúltase á Consellería da Presidencia para dicta-las normas que cumbran para o desenvolvemento e execución do establecido no presente decreto.

Terceira: Este decreto entrará en vigor ó día seguinte da súa publicación no Diario Oficial de Galicia.

Santiago de Compostela, 8 de Xaneiro de 1987.